



Fundasaun Mahein (FM), 26 Agustu 2020

Komunikadu Imprensa

Papel PNTL no F-FDTL ho Lisaun sira Husi Krize Saúde Públika (Covid-19) ba Seguransa Nasional

Covid-19 sai lisaun importante ba Timor-Leste - iha ne'ebé desde detekta kazu pozitivu ida iha fulan Marsu 2020 Timor-Leste hola kedas medida nesesariu hasoru pandemia global ne'e – iha tempu ne'ebé Timor-Leste infrenta hela impase polítika. Ho hanoin ida katak Estadu de-Emerjensia (EE) maka meiu legal ne'ebé fó kbiit ba Governu halo asaun polítika no seguransa hodi proteje vida sidadaun sira nian husi ameasa ne'e. Iha ne'e mosu luta kolektiva ida, Governu husu Prezidente Republika deklara EE liu husi votu autorizasaun Parlamentu Nasional nian.

Ho medida ne'ebé temi liu daudauk ne'e, to'o ohin Timor-Leste seidauk rejista kazu fatal ruma husi kazu Covid-19. Husi prespetiva seguransa nasional – hodi atua ameasa no risku sira ne'ebé Nasaun hasoru tau atuasaun integradu liu husi Sistema Integradu Seguransa Nasional (SISN), ne'ebé hala'o tuir lala'ok Lei Seguransa Nasional 2010 nian. Iha ne'ebé Sentru Integradu Jestaun Krize (SIJK) funsiona hanesan Sala Situasaun hodi jere krize ne'e iha Primeiru-Ministru nia Komandu.

Iha âmbito papel sira husi PNTL no F-FDTL nian durante hasoru krize saúde públika (Covid-19), FM louva ofisiais, sarjentu no ajente sira PNTL nia servisu maka'as. Liu-liu PNTL nian aproximasaun polisiamentu komunitariu ne'ebé vizibel tebes hanesan socializa regra sira EE no enkoraja sidadaun sira hala'o tuir medida sira prevensaun ba Covid-19. Tatika polisiamentu komunitariu ne'ebé PNTL aplika susesu tebes maske iha mos kritika balun hasoru PNTL. Nune'e mos ba F-FDTL nia apoiu iha âmbito seguransa interna nian no reforsa kontrolu sira iha fronteira terrestre, hamutuk ho PNTL, forsa seguransa sira seluk, profissionais saúde sira no ajente sira seluk luta hasoru surtu Covid-19. Ida ne'e hatudu katak luta hasoru ameasa no risku sira luta ida integradu.

Maske nune'e, iha violasaun balu ne'ebé komete husi militar no forsa seguransa – iha ne'ebé tuir relatóriu PDHJ identifika kazu violasaun direitus umanus no governasaun ladiak hamutuk 52 ne'ebé komete husi PNTL 38, F-FDTL 9 no Ministériu Edukasaun 5.

Iha sorin seluk FM nota kona-bá lisaun importante sira husi krize saúde públika ne'ebé implica ba seguransa umanu. Primeiru, fortalesementu institusaun, ezemplu ida, SIJK maka halo kordenasaun ba kna'ar integradu ema nian, instalasaun sira no meiu seluk, atu hatan ba situasaun todan risku ka ameasa nian. Kompetensia husi SIJK ida maka forma sira halo kordenasaun interministerial, hodi garante seguransa interna no atu hatan ba dezastre natural ka kalamidade públika sira; Nune'e, atu jere situasaun krize hanesan kalamidade públika, SIJK funsiona nu'udar Sala Situasaun iha kazu sira hanesan esepasaun konstitusional. Durante krize ne'e SIJK la funsiona ho Lei propriu ida hodi regula kona-bá ninia lalaok – ikus mai mosu dezentedementu balu husi responsavel Ministériu Saúde nian ho SIJK. Hafoin liu tiha dezentedementu ne'e Governu finaliza

dekretu-lei ida kona-bá regulamentu ba SIJK durante EE. Maske dekretu-lei ne'e aprova ona maibe la ho konsulta ne'ebé kle'an ho entidade relevante sira. Portantu SIJK la funsiona deit iha tempu krize maibe funsiona mos iha situasaun sira normal.

Segundu, seguransa umanu, menus ba ekipamentu no facilidade saúde, rekursu umanu, menus ba produsaun agrikola, hamlaha no nesesidade esensial sira durante pandemia Covid-19. Nune'e mos impase política ne'ebé la'o besik ona tinan tolu fó konsekuensia boot ba vida sosial no ekonomiku. Iha tempu hanesan Timor-Leste la iha mos Orsamentu Jeral Estadu no ekonomia ne'ebé depende deit ba osan husi mina rai nian no iha krize ida ne'e, Timor-Leste sofre liu tamba mina rai nia folin tun maka'as los iha merkadu mundial. Nune'e lisaun importante ba Timor-Leste maka tenke investe ba setor produtivu sira hodi hatama reseita ba Timor-Leste ho sustentavel. Maibe presiza mos ho estabilidade política hodi garante investimentu sira ne'e.

Terseiru, política seguransa nasional, mundu ohin loron, ameasa no risku sira kompleksu tebes, la'os deit ameasa konvensional sira maibe ameasa la'os konvensional mos. Iha ne'e ita presiza haree ho luan no kle'an, no tau atuasaun mos husi komponente oin-oin ne'ebé hola parte iha sistema seguransa nasional nian. To'o ohin loron Timor-Leste seidak iha Política Seguransa Nasional hodi trata asuntu sira ne'ebé temi liu daudauk ne'e. Iha âmbito ameasa no risku sira ba estabilidade nasional, ita la hatene ameasa no risku ba Timor-Leste iha tempu agora no futuro maka saida. Tamba ne'e, presiza Política Seguransa Nasional hanesan médiku ida hodi fó diagnosa lolos ameasa no risku sira ba Timor-Leste. Nune'e ninia atuasaun sira forma tuir atuasaun sira ne'ebé hatur ona iha Lei Seguransa Nasional 2010 iha kadru SISN katak atuasaun integradu no respeitu ba idak-idak nia autonomia, komplementaridade no uza rekursu ho eficiente. Covid-19 hanesan lisaun importante ida hodi dudu Governu prepara no elabora Política Seguransa Nasional ba Timor-Leste – tuir Lei Seguransa Nasional 2010 nia dispozisaun.

Rekomendasaun

1. Rekomenda ba Governu kontinua hametin institusaun sira Estadu nian no kapasidade resposta sira iha servisu públiku nian. SIJK hanesan lisaun ida ne'ebé Timor-Leste tenke aprende oinsa hametin institusaun sira Estadu nian responde ba krize sira ne'ebé Nasaun hasoru.
2. Rekomenda ba VIII Governu Konstitusional no ba futuro - lisaun sira husi krize saúde pública Covid-19 no husi EE fó hatene mai ita katak Timor-Leste tenke investe ba setor produtivu sira, no tenke iha estabilidade política mos. Nune'e atu hatan ba dezafiu sira ne'ebé Nasaun hasoru, liu-liu ameasa no risku sira tenke ho Política Seguransa Nasional ida.

Atu hetan informasaun kle'an liu kona-bá asuntu ne'e bele kontaktu:

João Almeida

Acting Director

Email: almeidamahein@gmail.com

Telemovel: (+670) 7756 1184 / 7710 3346

Website: www.fundasaunmahein.org